

INUIT ATAQATIGIIT

INATSISARTUNI



20. september 2013

Inatsisartut suleriaasianni § 37 naapertorlugu matumuuna naalakkersuisunut apeqquteqaateqarapunga:

1.

Inatsisileritooqatigiit Lett, DCE aamma PwC uranisioneq pillugu nalunaarussiaata inernilernera Naalakkersuisut isumaqatigaat? Naalakkersuisut qinnuigivakka inerniliinernut isumaqatiginnngiffimminnut ataasiakkaanut nassuiaateqaqqullugit.

2.

Danskit nunanut allanut naalakkersuisua nalunaaruteqarpoq, inatsisileritooqatigiit Lett-ikkut ineriniliussaak akerleriit arlaata isummamik nalunaarnerattut isigalugu. Naalagaaffik inatsisileritooqatigiinnut akerliulluni inerniliivoq uranimik aatsitassarsioneq tunisassiornerlu sillimaniarnermut politikkimut tunngasuunerarlugu. Oktoberip arfineq pingajuat tikitsinnagu Naalakkersuisut Naalagaaffillu inatsisilerinikkut aaqqiagiinngissummut tassunga aaqqeereersimassappat?

3.

Sillimaniarnissamut tunngasitsinerup tunngasitsinnginnerulluunniit ersarikkunnaarsitsinera Inatsisartut oqaluuserisassamut 106-imut suliaqarnissaannut qanoq kinguneqassava? Allangortitsinissaq ersarikkunnaarsisinneqarpa allanguinissap kingunissaanut ataasiakkaanut? Taamaappat sorliit kingunissat pineqarpat?

4.

Danmarkip Nunattalu periutsit sordiaat atorlugit isumaqatigiinngissut aaqqiiviginiarpaat? Naalagaaffeqatigiinnerup iluani saqitsaassutaasunik aaqqiissutaasinnaasut tamakkiisut nalunaarsornissaat kissaatigineqarpoq.

5.

Danmarkip Nunarput aatsitassanik qinngornernik ulorianartunik akulinnik aatsitassarsiorsinnaanerigalua pisortatigoortumik ajoqusersorsinnaavaa?

6.

Naalakkersuisut siulittaasuata, Aleqa Hammondip oqaatiginikuuaa uranisiortoqalissagaluarpap tunisassiortoqalissagaluarpallu soorunami sillimaniarnermut illersornissamullu kinguneqartussaasasooq. Taakkulu Aleqa Hammondip Danmark peqatigalugu ersarissaaffiginiarpai. Taamatut oqarneq itisilerneqarsinnaava, soorlu suut kingunissat tigussaasut eqqarsaatigineqarnersut.

(Inatsisartuni ilaasortaq, Naaja H. Nathanielsen)

Tungavilersuut

Inatsisartut siunissami uranisiornissamik tunisassiornissamillu aalajangernissaannut qaammataajunnaarpoq. Taamaakkaluartorli paatsiveerusimaarutigineqarpoq sunarpiaq Inatsisartut taasissutigissaneraat, aalajangernerullu kingunissai suussanersut. Paatsiveerusimaarneq kikkulluunniit iluaqutigisinnaanngilaat. Ajornartorsiortitsinerulerpoq paatsiveerusimaarneq naalakkersuinikkut suliaqartuneermat- taakkulu tassaallutik aalajangiisussat.

Septemberip 16-iani Naalakkersuisut siulittaasuata danskit nunanut allanut ministeriat, Villy Søvndal peqatigalugu tusagassiortunik katersortitsivoq Sammisat ilagivaat uranisiorneq. Tassani erserpoq danskit naalakkersuisuisa Naalakkersuisut imissimasaasa inatsisileritooqatigiit uranisiorneq pillugu inerniliussaata isumaqatiginngikkaat.

Naalagaaffik isumaqartuarsinnarpoq Nunatsinni uranisiorneq tunisassiornernerlu sillimaniarnikkut illersornissamullu Naalagaaffeqatigiinnut kinguneqartussaasooq. Taamaattumillu inatsisileritooqatigiit Lett-ikkunnit isummamik saqqummiunneqartumit allamik isumaqarlutik, inatsisileritooqatigiit isumaqarput uranisiorneq tunisassiornernerlu eqqissinermi atorineqarpata naalagaaffiup sillimaniarneranut attuumassuteqanngitsut.

Taakku saniatigut Siumup oqaaseqartartuata ammaanermi oqallinnermi oqaatigaa Inatsisartut isummerfigissagaat aatsitassap uraneqassusia. Kisianni aatsitassap uranimik akoqassusia Naalakkersuisut siunnersuutaanni saqqummiunneqarsimanngilaq.

Paatsorneqartoq nalinginnaasooq tassaavortaaq Inatsisartut aalajangiiffigissagaat uran atsitassarsionnermi saniatigut pissarsiassatut. Tamanna aamma eqqunngilaq. Inatsisartut isummerfigissavaat uranisiortoqassanersooq, tunisassiatut pingaarnertut saniatigulluunniit pissarsiassatut.

Toqqissisimananngilaq taasisutigineqartussa q pillugu paatsuungasoqartigisoqarmat, taasinissaq qallilluinnareertillugu. Tamavitta, qanorluunnit uranimut isumaqaralarutta qulakkeertariaqarparput paasisutissat pissutsillu piviusut tunngavigalugit oqaaseqartassagatta.